



# Sedia pembiayaan hartanah babit projek hijau, mampan

## Public Bank, Gamuda Land jalin kerjasama

Oleh Mohd Zaky Zainuddin  
zaky@bh.com.my

**Public Bank** dan Gamuda Land memeterai Memorandum Persefahaman (MoU) bagi menjalinkan kerjasama menawarkan pembiayaan hartanah yang membabitkan projek pembangunan hijau dan mampan.

Menerusi MoU itu, Public Bank mewujudkan Pakej Pembiayaan Mampan Istimewa untuk pembiayaan akhir bagi projek pembangunan hijau dan mampan oleh Gamuda Land, meliputi rumah kediaman dan komersial yang sudah menerima atau yang mahu mendapatkan pengiktirafan untuk kemampanan daripada Indeks Bangunan Hijau (GBI), GreenRE dan badan pentauliah lain.



Ah Lek (kiri) dan Chee Meng bertukar dokumen perjanjian.

(Foto ihsan Public Bank)

Pengarah Urusan dan Ketua Pegawai Eksekutif Public Bank, Tan Sri Dr Tay Ah Lek, berkata MoU menandakan peningkatan penyertaan institusi perbankan itu dalam perjalanan pertumbuhan hijau.

"Kumpulan Public Bank komited untuk mencapai neutraliti karbon menjelang 2030 dan pelepasan karbon sifar bersih menje-

lang 2050.

"Kumpulan juga komited untuk memperuntukkan sebanyak RM40 bilion pembiayaan mesra alam sekitar, sosial dan tadbir urus (ESG) menjelang 2025, termasuk pembiayaan untuk bangunan yang diperakui mesra alam," katanya dalam satu kenyataan.

Pada majlis pemeteraian MoU itu, Public Bank diwakili Ah Lek,

manakala Gamuda Land diwakili Ketua Pegawai Eksekutifnya, Ngan Chee Meng.

### Majukan agenda hijau

Ah Lek berkata, Pakej Pembiayaan Mampan Istimewa Public Bank yang ditawarkan kepada projek pembiayaan akhir Gamuda Land itu, termasuk faedah yang berseesuaian, kelulusan cepat dan pilihan pembiayaan untuk pelanggan membeli peralatan mesra alam dan jimat tenaga selain kelengkapan untuk meningkatkan lagi kemampanan hartanah hijau.

Sementara itu, Chee Meng berkata, Pelan Hijau Gamuda (GGP) adalah rangka kerja komprehensif yang merumuskan sasaran ketara yang dipacu pada dimensi ESG untuk lima tahun yang akan datang dan seterusnya.

Katanya, pelan itu memastikan kumpulan melaksanakan langkah khusus untuk mengurangkan intensiti pelepasan gas rumah hijau secara langsung dan tidak langsung sebanyak 30 peratus pada 2025 dan 45 peratus menjelang 2030.